



坤輿典第一百九卷

建都部彙考一

上古

大皞庖犧氏都于陳

按史記補三皇本紀大皞庖犧氏風姓代燧人氏繼天而王都於陳

按

帝王世紀宓戲爲天子都陳在禹貢豫州之域西望外方東及明諸於周陳胡公所封故春秋傳曰

陳太昊之墟也於漢屬淮陽今陳國是也

按路史太昊生於仇夷長於起城都於宛丘故陳爲

太昊之虛

注

世紀天皇庖犧都陳留遁甲注云伏羲徙治陳倉地非陳國則不必宛丘矣然歷代

以宛丘爲太昊之虛今宛丘北一里有伏羲廟八卦壇寰宇記云伏羲於蔡水得龜因畫八卦之

壇有長史張齊賢文李邕易之然九域志陳蔡俱有八卦壇此後人附會按姚睦亦云黃帝都陳

則羲黃俱在西方矣豈其先後徙邪

炎帝神農氏都曲阜

按史記補三皇本紀炎帝神農氏長於姜水因以爲姓初都陳後居曲阜

注按今淮陽有神農井又左傳魯有大庭氏之庫是也

并又東北醫無閭之地爲幽又青之東北遼東等處爲營而冀止有河內之地今河東一路是也劉氏云冀州之域大於九州於是分爲幽并以此二州北并外裔使不得接於王畿書大傳虞夏傳云兆十有二州注兆域也爲營域以祭十二州之分星也

五服

甸侯綏要荒葉氏云禹制五服每服率五百里而王畿甸服在其內則一方爲二千五百里東西南北相距各五千里此所謂彌成五服至於五千者也至周而益爲九畿每畿亦五百里而王畿又不在此內則一方爲五千里南北東西各萬里周之地果如是廣乎學者求其說而不得故鄭氏以堯舊服五千里至禹治水之後又增其倍謂禹貢所記爲舊服所增之數以與周制合又謂周公攝政斥大九州之境故五等諸侯之封大者增其五之四小者增其十之五此皆矯妄不經無所取信以周官大司馬九畿之籍考之方千里曰國畿其外亦皆以方言方者謂四方也四方環之爲千里徑數之每方當止爲二百五十里則周之畿爲儉於禹矣林氏云以王制考之堯都冀州自恆山至南河千里自東河至西河千里此畿內千里卽甸服也自東河至東海千里自西河至流沙千里此千里

建五百里侯服五百里綏服而東海流沙之外則爲要荒誠合經之所載至於南北則有盈縮焉以北考之冀之北距恆山已接於邊陲其間何以容二千五百里之侯綏要荒哉以南考之自南河至江千里已建侯服綏服矣自江至衡山千里則要荒二服又在九州之內矣然自衡山至南海又千里揚州之境且南距海則九州且包乎要荒之外是以南考之則太盈以北考之則太縮竇疑而未知其說意其必有乘除相補於其間也應氏云自秦而上西北袤而東南感自秦而下東南展而西北縮古今之疆理天地之大運中國外裔之消長大略可見當先王盛時東西南北各有不盡之地蓋聽四夷居之不勞中國以事外也若禹貢之東漸西被而朔南咸暨特其聲教之所及非必貢賦之所限也故外薄四海稱成五服至于五千者此區域之大數而疆理之略者也四海之內斷長補短方三千里者此民田之大數而疆理之詳者也觀於曰內曰外二字而治之詳略可知矣王氏曰舜之五服侯甸綏三服在九州之內要服有夷荒服有蠻在九州之外成周九服侯甸男采衛要六服在九州之內夷鎮蕃三服在九州之外

禹九州

冀堯青徐揚荆豫梁雍通典云雍州西境流沙之西荊州南境五嶺之南所置郡縣並非九州封域之內帝王世紀云堯遭洪水分爲十二州今虞書是也及禹平水土還爲九州今禹貢是也是以其時九州之地凡二千四百三十萬八千二十四頃定墾者九百一十萬八千二十四頃不墾者千五百萬二千頃民口千三百五十五萬三千九百二十三人至於塗山之會諸侯承唐虞之盛執玉帛亦有萬國是以山海經稱禹使大章步自東極至於西垂二億三萬三千五百里七十一步又使豎亥步南極盡於北垂二億三萬三千五百里七十五步四海之內則東西二萬八千里南北二萬六千里出水者八千里受水者八千里名山五千三百五十經六萬四千五百六十六里出銅之山四百六十七出鐵之山三千六百九以供財用蘇氏云堯水河爲患最甚江次之淮次之河行冀堯爲多而青徐其下流被害亦甚堯都於冀故禹行自冀始次於堯次於青次於徐四州治而河患衰矣雍豫雖近河以下流旣治可以少緩也故次於揚次於荆以治江淮江淮治而水患平故次於豫次於梁次於雍以治江河上流之餘患而雍最高故終焉朱氏云冀州極闊河東河北皆屬焉雍州亦闊陝西五路皆屬焉若青堯徐豫則疆界有不足者矣鄭氏云州縣之設有時而更山川之形千古不易

所以禹貢分州必以山川定經界使兗州可移而濟河之兗不能移使梁州可遷而華陽黑水之梁不能遷是故禹貢爲萬世不易之書 薛氏云至夏復爲禹貢之九州

商九有

爾雅九州兩河間曰冀河南曰豫河西曰豳漢南曰荆江南曰揚濟河間曰兗濟東曰徐燕曰幽齊曰營孫炎云此蓋殷制孔氏云禹貢有梁青無幽營周禮有幽并無徐營孫炎以爾雅之文與禹貢不同於周禮又異故疑爲殷制耳亦無明文言殷改夏也地理志云殷因於夏無所變改陸氏曰禹貢有青徐梁而無并幽營爾雅有徐幽營而無青梁并職方有青幽并而無徐梁營三代不同故也陳氏云商書言九有之師商頌言奄有九有式于九圍王制於商亦言九州于七百七十三國則商之九州蓋亦襲夏而已通典云塗山之會萬國四百年間遞相兼并殷湯受命其能存者三千餘國亦爲九州 冀州在兩河之間西則龍門之河東則降水大陸之河降水大陸今冀貝二州界 論語三分天下有其二注天下歸文王者六州荆梁雍豫徐揚也惟青兗冀尙屬紂

周九州

揚荊豫青兗雍幽冀并鄭氏注揚荊豫兗雍冀與禹貢略同青州則徐州地也幽并則青冀之北也
無徐梁晉地理志云成王時改作禹貢徐梁入於青雍冀野析於幽并王氏云九州之序禹貢始於
冀次以兗而終於雍職方氏則始於揚次以荆而終於并者蓋禹貢言治水之序也職方言遠近之
序也治水則自帝都而始然後順水性所便自下而上故由兗至雍而止也以遠近言之則周之化
自北而南爲遠故關雎鵲巢之詩分爲二南漢廣亦言文王之道被於南國德化之所及以遠爲至
也始於揚則以揚在東南次以荆則以荆在正南終於并州以并在正北先遠而後近也左傳王使
詹桓伯辭於晉曰我自夏以后稷魏駘芮岐畢吾西土也及武王克商蒲姑商奄吾東土也巴濮楚
鄧吾南土也肅慎燕亳吾北土也漢賈捐之曰武丁成王殷周之大仁也然地東不過江黃西不過
氏羌南不過蠻荆北不過朔方鄭氏鏐曰周無徐州蓋其地爲淮夷徐奄所有李氏曰周都雍不
可不廣故合梁雍爲一徐地狹隘故青兼之

九畿 九服 六服 五服

大司馬九畿方千里曰國畿其外侯甸男采衛蠻夷鎮蕃職方氏九服方千里曰王畿其外侯甸男

采衛蠻夷鎮蕃大行人邦畿方千里其外侯甸男采衛要服九州之外謂之蕃國周官六服羣辟罔不承德六年五服一朝周語祭公謀父曰先王之制邦內甸服邦外侯服侯衛賓服蠻夷要服戎翟荒服甸服者祭侯服者祀賓服者享要服者貢荒服者王日祭月祀時享歲貢終王先王之訓也葉氏曰禹別九州制天下爲五服王畿在其內周公分天下爲九畿而王畿不與以侯甸男采衛之在中國者爲五服言罔不承德則舉六服合王畿言也言六年一朝則舉五服別諸侯言也鄭氏以殷之大界方三千里以開方計之方千里者九其一爲縣內餘八各立一州合內外總爲千七百七十三國周公復唐虞之地分五服爲九其要服之內方七千里意以夏末既衰中國之地爲四夷所侵至周方能復之今考於禹貢所謂五服皆五百里爲別則是要服之內通於四面距中國之地乃方三千里達於荒服止於五千里康成旣以殷之大界方三千里矣固合於禹貢中國之地而謂四夷所侵者果何地也周公雖斥大九州之界而地加於禹貢者纔五百里今職方氏分九州之邦國方千里爲王畿自侯甸男至於采衛皆方五百里是五服之地方二千五百里合王畿計之方三千五百里由三千五百里分之合四面相距方七千里乃康成所謂要服之內也蓋禹貢所謂要荒卽周

官所謂蠻夷鎮蕃通要荒而合於禹貢中國之地則唐虞夏殷之時中外凡方一萬里通蠻夷鎮蕃而合於周官則周公之時中外凡萬一千里以其一千里之多是以周公斥大封疆纔五百里康成不知異同在此而唯見要服之內方七千里乃牽左氏執玉帛者萬國之說而謂唐虞之時非七千里不能容之且仲虺之誥言表正萬邦纘禹舊服則是湯之時固有萬國矣所謂大界三千里者何以能容之也然則九州之內千七百七十三國未必殷制王氏曰畿言其有界畫服言其服王事六年五服一朝者以侯甸男邦采衛言也六服羣辟罔不承德者兼要服而言之也先王之制中國五服而周官言六者蓋近中國之外裔承德則國家閒暇可以明政刑之時也方是時也四征弗庭其治未若制禮之際爲已備矣故其限朝止於五服而已周官行人於六服之見則及於要服者則其治爲尤詳於四征弗庭之時也近中國之外裔非特承德而又能入貢以來見焉則制禮以致太平者此其極也鄭氏曰要服蠻服也九州之外夷鎮蕃服也 陳氏曰衛侯之外聖人雖制之服而不必其來故武成洛誥康王之誥止言五服

易氏曰禹之五服則計其一面之數周之九服則計其兩面之數禹之甸服千里而止言五百里是

計其一面者也周之王畿與禹之甸服同不言五百里而兼言千里是計其兩面之相距者也蓋禹之五服王畿在內王畿千里而兩面各五百里數其一面故曰五百里甸服自甸服至荒服皆數其一面每面各五百里總爲二千五百里兩面相距則凡五千里職方氏所載則王畿不在九服之內自方五百里之侯服至於方五百里之蕃服其名凡九九服每面各二百五十里通爲二千二百五十里兩面相距則通爲四千五百里并王畿千里則通爲五千五百里其增於禹者五百里之蕃服耳然周之蕃服雖不列於禹貢九州之外而禹貢九州之外咸建五長東漸西被卽成周蕃服之域是周之蕃服其名雖增於禹而其地未嘗增也周之邦畿卽禹貢之甸服周之侯甸卽禹貢之侯服周之男采卽禹貢之綏服周之衛蠻卽禹貢之要服周之夷鎮卽禹貢之荒服 呂氏曰在商之時古公以皮幣犬馬珠玉事獯鬻而商王不知在周之時晉國拜戎不暇而周室不與然則三代禦邊之略蓋可知矣

四極 四荒

爾雅東至於泰遠西至於邠國

說文作汎國汎西極之水也府巾切

南至於濮鈇北至於祝栗謂之四極此四方極遠之國觚竹北戶西王母日下謂之四荒觚竹者漢地理志遼西令支有孤竹城齊語北伐山戎刺令支斬孤竹括地志孤竹殷諸侯古城在平州盧龍縣南十二里史記正義孤竹君是殷湯正月三日丙寅封相傳至夷齊之父

北戶者卽日南郡顏師古曰在日之南所謂開北戶以向日者秦始皇紀南至北嚮戶輿地廣記景州北景縣漢屬日南後爲林邑所據晉九真太守灌寔討林邑於其國五月五日立八尺表日景在表南九寸一分故自北景以南皆開北戶以嚮日唐於驩州南境僑立景州非正北景也淮南墜形訓南方曰都廣曰及戶

西王母者山海西荒經西海之中流沙之濱有崑崙之丘有人戴勝虎齒名曰西王母穆天子傳天子賓於西王母乃紀其跡於弇山名曰西王母之山

日下者日所出處其下之國淮南天文訓日出於暘谷浴於咸池拂於扶桑是謂晨明通典東夷有扶桑在中國之東其土多扶桑木倭一名日本自云國在日邊山海東荒經大荒之中有山曰大言日月所出有大人之國有山曰合虛日月所出有中容之國呂氏春秋禹東至搏木之地日

出九津青羌之野

呂氏春秋凡四海之內東西二萬八千里南北二萬六千里水道八千里受水者亦八千里通谷六
名川六百陸注三千小水萬數凡四極之內東西五億有九萬七千里南北亦五億有九萬七千里
極星與天俱遊而天樞不移冬至日行遠道周行四極命曰元明夏至日行近道乃參於上當樞之
下無晝夜白民之南建木之下日中無影呼而無響蓋天地之中也尸子云八極之內有君長者東
西二萬八千里南北二萬六千里故曰天左舒而起牽牛地右闢而起畢昴淮南墜形訓八極東
北方曰方土之山曰蒼門東方曰東極之山曰開明之門東南方曰皮母之山曰陽門南方曰南
極之山曰暑門西南方曰編駒之山曰白門西方曰西極之山曰閭闔之門西北方曰不周之山
曰幽都之門北方曰北極之山曰寒門

張衡靈憲云八極之維徑二億三萬二千三百里南北則短減千里東西則廣增千里自地至天半
於八極則地之深亦如之朱文公謂爾雅四極恐未必然邠國近在秦隴非絕遠之地也靈憲所言
八極之廣原於歷算若有据依然非專言地之廣狹也 呂氏春秋九塞大汾冥阨荆阮方城殺井

經今疵句注居庸

秦四十郡

晉地理志云始皇初并天下懲忒戰國削罷列侯分天下爲三十六郡內史 漢三輔及弘農郡

三川 漢河內河南兩郡

河東南陽南郡九江 漢並因之

鄣郡 治故鄣在今湖州長興縣西南它郡所治當考漢改爲丹陽郡

會稽潁川 漢並因之

碭郡 漢梁國

泗水 漢改爲沛郡

薛郡 漢魯國

東郡琅邪 漢並因之

齊郡 漢齊國

上谷漁陽右北平遼西遼東代郡鉅鹿邯鄲上黨太原雲中 漢並因之

九原 漢改爲五原郡

鴈門上郡隴西北地漢中巴郡蜀郡 漢並因之

黔中漢改爲武陵郡今鼎澧辰沅黔州之地

長沙 漢長沙國

凡三十六郡於是興師踰江平取百越置桂林 漢改爲鬱林郡

南海 治番禺漢因之

象郡 漢改爲日南郡

閩中 徐廣曰治候官漢武帝虛其地

合四十郡郡一守焉其地則西臨洮而北沙漠東縈西帶皆臨大海秦紀云地東至海暨朝鮮西至
臨洮羌中南至北嚮戶北據河爲塞並陰山至遼東周書作雒篇千里百縣縣有四郡 說文周制
天子地方千里分爲百縣縣有四郡

呂氏曰春秋之時郡屬於縣趙簡子誓衆所謂上大夫受縣下大夫受郡是也戰國之時縣屬於郡秦紀惠文十年魏納上郡十五縣是也方孝公商鞅時并小鄉爲大縣縣一令尙未有郡牧守稱及魏納上郡之後十餘年秦紀始書置漢中郡或者山東諸侯先變古制而秦效之歟按戰國策楚王以新城爲主郡以此考之郡之所治必居形勢控扼之地郡者縣之主故謂之主郡又云三川河東在諸郡之首者蓋所以陪輔關中地勢莫重焉卽漢所謂三河也漢分三川爲河南河內與河東號爲三河史記貨殖傳曰昔唐人都河東殷人都河內周人都河南夫三河在天下之中若鼎足王者所更居也建國各數百千歲胡氏曰郡縣天下可以持承平不可以支變故封建諸侯可以持承平可以支變故孫氏曰郡縣之制盡剗根著之舊以爲空虛之天下匹夫亡秦五胡覆晉盜賊篡唐此非有秦人取天下之威而失之反掌 漢高祖紀有東陽郡吳郡鄱郡灌嬰傳有豫章郡皆非秦郡蓋楚漢之際所置

郡國更置

地理志漢興以秦郡太大稍復開置又立諸侯王國武帝開廣三邊故自高祖增二十六文景各六

武帝二十八昭帝一訖於孝平凡郡國一百三縣邑千三百二十四道三十二侯國二百四十一地
東西九千三百二里南北萬三千三百六十八里晉志漢分內史爲三部更置郡國二十有三桂陽
江夏豫章河內魏郡東海楚國平原梁國定襄泰山汝南淮陽千乘東萊燕國清河信都常山中山
渤海廣漢涿郡合二十三內史者河上渭南中地武帝改以爲京兆馮翊扶風是爲三輔文增厥
九廣平城陽淄川濟南膠東河間廬江衡山武帝改衡山曰六安景加其四濟北濟陰山陽北海宣
帝改濟北曰東平武帝開越攘胡初置十七南海蒼梧鬱林合浦交趾九真日南珠崖儋耳九郡平
西南夷置牂柯越嶲沈黎汶山犍爲益州六郡西置武都郡又分立零陵郡合十七郡拓土分疆又
增十四弘農臨淮西河朔方酒泉陳留安定天水元菟樂浪廣陵敦煌武威張掖昭帝少事又增其
一金城至平帝元始二年凡新置郡國七十有一與秦四十合一百一十有一今按晉志云郡國一
百十一而漢志止一百三以秦郡攷之南海因舊名桂林更名鬱林象郡更名日南閩中元封元年
虛其地則四十郡省者一因改者三漢初未定兩粵止有三十六郡通典謂新置六十三與秦四十
合百三亦未攷此也以武帝初置郡攷之天漢四年并沈黎于蜀始元五年罷儋耳臨屯真番地節

三年并汶山于蜀初元三年罷珠厓凡省六郡而臨屯真番元封三年開朝鮮所置者晉志不載則并省者四除八郡正合漢志一百三之數林氏云漢山川不出禹貢分域而里數倍加者古今尺步不同吳氏云南北萬三千餘里舉朔方日南而言按史記平準書漢連兵三歲誅羌滅南越番禺以西至蜀南者置初郡十七卽晉志所謂初置者南海至儋耳九郡皆南越地武都至汶山五郡皆西南夷地夜郎爲犍爲滇爲益州 今化外姚州

并零陵爲十七郡酒泉武威張掖敦煌本匈奴昆邪休屠地是爲河西四郡并金城謂之河西五郡又定朝鮮爲四郡樂浪元菟在遼東之東通典云今爲東裔之地臨屯治東曉真番治霫見於茂陵書又擊匈奴取河南地築朔方亦初郡也元朔置蒼海三年而罷元始置西海中興而廢故志不著隴西天水安定北地上郡西河是爲六郡名將多出焉北地朔方五原雲中定襄鴈門代郡西河是爲緣邊八郡除北地西河而益右北平上谷陽漁是爲緣邊九郡存其國號而屬漢者曰屬國置都尉安定上郡天水五原張掖是爲五屬國其後金城西河北地亦置焉按武帝初置無象郡 茂陵

書云治臨塵